



Broj: T01 0 KTK 0043475 23
Bihać, 23.05.2024. godine

OPĆINSKOM SUDU U BIHAĆU
Sudiji za prethodno saslušanje

Na osnovu odredbe iz člana 45. stav (2) tačka i), a u vezi sa odredbom iz člana 241. stav (1) Zakona o krivičnom postupku Federacije Bosne i Hercegovine („Službene novine FBiH“ br. 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13, 59/14 i 74/20 – u daljem tekstu ZKP F BiH), p o d i ž e m:

OPTUŽNICU

PROTIV:

- AZRE ĆEMALLOVIĆ,**
- ARIJANE DELIĆ,**
- EDIJA DUPANOVIĆA,**
- DAMIRA DEMIROVIĆA,**

zbog postojanja osnovane sumnje

DA SU

1. AZRA ĆEMALLOVIĆ, ARIJANA DELIĆ I EDI DUPANOVIĆ

Dana 02.09.2022. godine, u Bihaću, u službenim prostorijama JU „Stanouprava“ Bihać, kao službene osobe, Azra Ćemalović predsjednica Komisije za prijem u radni odnos po Javnom oglasu za upražnjeno radno mjesto Referent pripreme i nadzora na održavanju i osiguravanju zajedničkih dijelova i uređaja zgrade, a Arijana Delić i Edi Dupanović članovi iste Komisije, imenovani Odlukom direktora broj: 01/K-30-2372/22 od 26.08.2022. godine, prilikom provođenja postupka izbora kandidata za navedeno radno mjesto, znajući da je ranijem zaposleniku JU „Stanouprava“ Bihać R. Z. iz Bihaća, prethodno rješenjem broj: 01-03/01-30-2073/22 od 14.07.2022. godine prestao radni odnos na temelju presude Vrhovnog suda FBiH broj: 17 0 Rs 092868 20 Rev od 31.03.2022. godine, iskoristili svoja službena ovlaštenja koja su im povjerena članom 10. Uredbe o postupku prijema u radni odnos („Sl.glasnik Unsko – sanskog kantona“ broj: 7/19) kojim je propisano da provođenje procedure izbora kandidata na upražnjena radna mjesta vrši Komisija za provođenje javnog oglasa, potom člana 12. iste Uredbe, člana 13. Pravilnika o radu JU „Stanouprava“ Bihać broj: 04/01-4086/21 od 29.12.2021. godine te člana III Odluke broj: 01/K-30-2372/22 od 26.08.2022. godine, kojima je propisano da će neuredne, nepotpune i neblagovremene prijave komisija za provođenje

javnog oglasa odbaciti obavještenjem i da shodno članu 14. Pravilnika o radu pravo učešća u izbornom procesu imaju samo kandidati čije su prijave uredne, potpune i blagovremene, na način da su prilikom otvaranja i razmatranja prijave kandidata R. Z., nesporno utvrdili da isti ne ispunjava poseban uslov za obavljanje predmetnog radnog mjesta u pogledu stručne spreme – IV stepen, SSS, građevinsko – tehnička škola, propisan u članu 23. Pravilnika o unutrašnjoj organizaciji i sistematizaciju ustanove, („Sl. glasnik Grada Bihaća“ broj: 9/2018), što su i pismeno konstatirali u Izvještaju o provedenom postupku izbora kandidata po javnom oglasu na neodređeno vrijeme broj: 2425/22 od 02.09.2022. godine pa iako su sukladno gore navedenim propisima bili u obavezi prijavu R. Z. odbaciti kao nepotpunu jer je isti dostavio diplomu Mješovite elektrotehničke i drvoprerađivačke škole sa zvanjem RTV mehaničar, isti su unatoč tome prijavu kandidata R. Z. ocijenili kao potpunu, urednu i blagovremenu i potom uputili potpisan pisani prijedlog rang liste direktoru Damiru Demiroviću, na kojoj je R. Z. bio jedini kandidat, a što su i htjeli, na koji način su R. Z. pribavili korist u vidu daljeg učešća u proceduri po predmetnom javnom oglasu te su omogućili direktoru da sa R. Z. zaključi ugovor o radu na neodređeno vrijeme na radnom mjestu za koje nije ispunjavao posebne uslove u pogledu stručne spreme,

Dakle, u svojstvu službenih osoba, iskorištavanjem svojih službenih ovlaštenja drugom pribavili korist

2. DAMIR DEMIROVIĆ

Dana 05.09.2022. godine, u Bihaću, kao službena osoba – direktor JU „Stanouprava“ Bihać, svjestan da iskorištavanjem svojih službenih ovlaštenja u rukovođenju radom Ustanove koja su mu povjerena članom 44. i 53. Pravila JU „Stanouprava“ Bihać („Sl. glasnik Grada Bihaća broj: 14/17, 5/20) i člana 19. i 20. Pravilnika o radu, nezakonito zapošljava R. Z. iz Bihaća, a što je htio, postupio protivno odredbi člana 14. Pravilnika o radu, kojom je propisano da pravo učešća u izbornom procesu imaju samo kandidati čije su prijave uredne, potpune i blagovremene, na način da je donio Odluku o prijemu u radni odnos na neodređeno vrijeme, broj: 01-03/01-30-2437/22 od 05.09.2022. godine kojom se R. Z. prima u radni odnos na neodređeno vrijeme na radno mjesto Referent pripreme i nadzora na održavanju i osiguravanju zajedničkih dijelova i uređaja zgrade, da bi potom dana 12.09.2022. godine sa R. Z. zaključio ugovor o radu na neodređeno vrijeme za obavljanje poslova tog radnog mjesta, broj: 01-03/01-30-2516/2022, iako je bio svjestan da R. Z. ne ispunjava poseban uslov za obavljanje predmetnog radnog mjesta u pogledu stručne spreme – IV stepen, SSS, građevinsko – tehnička škola, propisan u članu 23. Pravilnika o unutrašnjoj organizaciji i sistematizaciji ustanove, jer je pregledao i svojeručno potpisao Izvještaj o provedenom postupku izbora kandidata po javnom oglasu na neodređeno vrijeme broj: 2425/22 od 02.09.2022. godine Komisije iz tačke 1), na koji način je Z. R. pribavio korist u vidu zasnivanja radnog odnosa na radnom mjestu za koje ne ispunjava posebne uslove u pogledu stručne spreme

Dakle, u svojstvu službene osobe, iskorištavanjem svojih službenih ovlaštenja drugom pribavio korist,

Čime bi pod tačkom 1. Azra Ćemalović, Arijana Delić i Edi Dupanović počinili krivično djelo Zloupotreba položaja ili ovlaštenja iz člana 383. stav (1) KZ FBiH u vezi sa članom 31. KZ FBiH, a pod tačkom 2. Damir Demirović krivično djelo Zloupotreba položaja ili ovlaštenja iz člana 383. stav (1) KZ FBiH

Na osnovu navedenog stavljam:

- Prijedlog Sudu da Damiru Demiroviću temeljem odredbe člana 71. tačka „c)“, a u vezi sa članom 76. stav (1) i (2) KZ FBiH izrekne sigurnosnu mjeru – zabranu vršenja funkcije direktora javnih ustanova u trajanju od najmanje 2 (dvije) godine
- Prijedlog Sudu da Azri Ćemalović, Arijani Delić i Ediju Dupanoviću temeljem odredbe člana 71. tačka „c)“, a u vezi sa članom 76. stav (1) i (2) KZ FBiH izrekne sigurnosnu mjeru – zabranu rada u komisijama za prijem u radni odnos u JU „Stanouprava“ Bihać u trajanju od najmanje 2 (dvije) godine

KANTONALNI TUŽILAC